

Ka Shithi U Apostol Paul Sha U Philemon

¹Ka jingkhublei na u Paul, u nongsah byndi U Jisu Khrist bad na u Timothi, u para jong ngi.

Ha u Philemon, u lok baieid bad u para ba iatrei lem bad ngi. ²Kumjuh ruh ia ka para baieid jong ngi ka Apphia, u Arkhippos, uba la shakri lang bad ngi kum u shipai jong U Trai bad ha ka balang kaba iaseng ha iing jong me.

³Ka jingaiei bad ka jingsuk ha me na U Blei uba U Kpa jong ngi bad U Jisu Khrist uba U Trai.

Ka Jingieid Bad Ka Jingngeit U Philemon

⁴Nga kynmaw ia me ha ki jingduwai jong nga bad nga ainguh ia U Blei borabor na ka bynta jong me, ⁵haba nga la iohsngew ia ka jingieid kaba me don sha ki riewkhuid baroh bad ia ka jingngeit jong me kaba ha U Trai Jisu. ⁶Nga duwai ba kata ka jingiasyllok ka jingngeit jong me kan ioh long kaba don bor ba men sngewthuh ia baroh ki jingkyrkhu kiba ngi don ha U Khrist. ⁷Ko para jong nga, la pynkmen bad pyntngen eh ia ka dohnud jong nga namar me la pynpaw ia ka jingieid bad ka jingiarap jong me sha ki riewkhuid kaba la pyntngen shikatdei eh ia ki.

To Pdiang ia U Onesimos Kum ia La U Para

⁸Hynrei ka dang don kaei kaei kaba me dei ban leh bad namar ka iktiar kaba nga don ha U Khrist, nga lah ban shu hukum ia me ban men leh ia kata, ⁹pynban ngam kwah ban shu hukum, hynrei nga kyrpad ba men leh ia kata da ka jingieid. Ma nga, u Paul, u riewtymmen bad u nongsah byndi U Khrist Jisu, ¹⁰nga kyrpad ia me na ka bynta u Onesimos u khun jong nga ia uba nga la pynkha ha iingbyndi. ¹¹Mynshuwa u la long u bym myntoi ia me, hynrei mynta u long shisha uba myntoi ia me bad ia nga.

¹²Ngan pahang biang ia u sha me uba long ka bynta jong ka dohnud jong nga hi. ¹³Toi

nga la kham kwah ban bat ia u khnang ba un ioh shakri ia nga hangne ha iingbyndi katba nga dang ialap ia ka Gospel. Ka jingiarap jong u ia nga, ka long kumba me hi me shakri ia nga. ¹⁴Hynrei ngan ym leh ei ei ruh em khlem da kylli shuwa na me, khnang ba kata kaba me leh kan long da ka mon sngewbha jong me hi, ym da ka jingpynbor jong nga.

¹⁵La pyniakhlad ia u Onesimos na me katto katne por, lehse kata ka jia khnang ba men ioh biang pat ia u junom, ¹⁶ym shuh tang kum u mraw, hynrei kham halor ia u mraw, kum ia u para baieid keiñ, khamtam eh ha nga. Kaba katno tam kan long ha me, u mraw ha ka doh bad u para baieid ha U Trai namar ka jingngeit.

¹⁷Lada me ñiew ia nga kum u paralok jong me, to pdiang biang ia u Onesimos, kumba me la pdiang sngewbha ia nga. ¹⁸Lada u la leh bymdei ei ei ia me lane u la kit ram ei ei, sa kheiñ ia kata ha nga. ¹⁹Nga, u Paul, nga thoh hi da la ka jong ka kti: Ngan sa siew lut ia ka ram u Onesimos bad ngan ym kren ei ei katno ba me ruh me kit ram ha nga namar la ka jingim. ²⁰Kumta ko para, kum u nongbud jong U Trai to leh ia kane na ka bynta jong nga, kan long ka jingtngen bakhraw ia nga kum u hynmen jong me ha U Khrist. ²¹Nga thoh ia kane ka shithi namar nga tip ban men leh ia kaba nga ong, wat palat ia kata ruh.

²²Kumjuh ruh, sa pynkhreh kawei ka kamra na ka bynta jong nga. Nga kyrmen ba U Blei un jubab ia ki jingduwai jong me ba ngan ioh wan jngoh ia me keiñ.

Ki jingkhublei Khatduh

²³U Epaphras u para ba ia sah byndi lem bad nga namar U Khrist Jisu, u ai khublei ia me. ²⁴Kumjuh ruh u Markos, u Aristarkhos, u Demas bad u Loukas ki khublei ia me. Kine ki dei kita kiba iatrei lang bad nga.

²⁵To ka jingaiei U Jisu Khrist uba U Trai jong ngi kan long lem bad ka mynsiem jong me.